

Dumonda Locher Benguerel concernent la realisaziun da l'agenda d'integraziun 2019 en il chantun Grischun

Il mars 2019 entra la nova legislaziun federala d'asil en vigur e cun quai cumenza er la realisaziun da l'agenda d'integraziun 2019. L'agenda d'integraziun ha definì tschintg finamiras d'effects. Tenor la publicaziun da la confederaziun ha ella tranter auter la finamira che giuvenils e persunas giuvnas creschidas emprendan pli svelto ina lingua naziunala e sa preparan per in'activitad professiunala. Uschia pon els tschiffar pe en la vita professiunala, avair quità da sasez e s'integrar en la societad. Quai rinforza la coesiun sociala e fraina l'augment dals custs da l'agid social.

Il chantun Grischun dat dapi onns in bun exempel per la promoziun da l'integraziun. Per exempel cun il project da pilot "Paja parziala plus" per fugitivas e fugitivs reconuschids e per persunas admessas provisoricamain vala il Grischun sco chantun precursor.

En connex cun il rapport da furmaziun da la Svizra il pli actual survegn l'agenda d'integraziun ina impurtanza speziala. Il rapport ha mussà en moda impressiunanta in punct debel en vista al dumber fitg pitschen da diploms dal stgalim secundar II dals giuvenils ch'èn naschids a l'exteriur. L'onn 2015 èn immigrads spezialmain blers giuvenils betg accompagnads en Svizra ed en il Grischun. Considerond quest fatg èn questas enconuschientschas da gronda brisanza. Quests umans giuvens stattan oz exactamain a la sava da la scolaziun professiunala.

Per realisar l'agenda d'integraziun 2019 ha la confederaziun triplà la pauschala d'integraziun als chantuns. Er il chantun Grischun è dumandà d'extender anc pli sistematicamain las bunas mesiras d'integraziun existentas per che las finamiras vegnian cuntanschidas.

En vista a quests fatgs tschentan las sutsegnadras ed ils sutsegnaders las suandantas dumondas a la regenza:

1. Tge urari ha la regenza previs per la realisaziun da l'agenda d'integraziun?
2. Vegn il program chantunal d'integraziun 2018–2021 adattà sin basa da l'agenda d'integraziun e cumpletà cun las tschintg finamiras d'effects?
3. Cun tge mesiras quinta la regenza da realisar la finamira, tenor la quala 80 % dals uffants fugitivs che arrivan en Svizra en la vegliadetgna da 0 fin 4 onns, chapeschan il cumenzament dal temp da scola obligatoric la lingua discurrenda a lur domicil?
4. Cun tge mesiras quinta la regenza da realisar la finamira, tenor la quala dus terzs da las fugitivas e dals fugitivs reconuschids sco er da las persunas admessas provisoricamain tranter 16 e 25 onns sa chattan suenter 5 onns en ina furmaziun fundamentala professiunala?
5. Co pensa la regenza da controllar regularmain l'effect da las mesiras da l'agenda d'integraziun?

Cuira, ils 12 da favrer 2019

Locher Benguerel, Caviezel (Tavau Clavadel), Märchy-Caduff, Alig, Atanes, Baselgia-Brunner, Bigliel, Brandenburger, Brunold, Cahenzli-Philipp, Caluori, Cantieni, Casutt-Derungs, Cavegn, Caviezel (Cuira), Clalüna, Cramerli, Danuser, Degiacomi, Deplazes (Cuira), Deplazes (Rabius), Derungs, Fasani, Favre Accola, Florin-Caluori, Flüttsch, Föhn, Gasser, Geisseler, Gort, Gugelmann, Hitz-Rusch, Hofmann, Holzinger-Loretz, Horrer, Jenny, Kohler, Loepfe, Loi, Maissen, Müller (Favugn), Niggli-Mathis (Grüsch), Noi-Togni, Perl, Preisig, Rettich, Ruckstuhl, Rutishauser, Schmid, Schneider, Schwärzel, Thöny, Valär, Wellig, Widmer (Favugn), Widmer-Spreiter (Cuira), Wilhelm, Holliger, Lunghi